



Republika e Kosovës
Republika Kosova-Republic of Kosovo
Kuvendi - Skupština - Assembly

Legjislatura III
Sesioni vjeshtor

Seancë plenare e Kuvendit

P- 049

Prishtinë, më 4 dhjetor 2008, në orën 10:0

Ndërtesa e Kuvendit, salla e seancave plenare.

P R O C E S V E R B A L

I SEANCËS PLENARE TË KUVENDIT TË REPUBLIKËS SË KOSOVËS, TË MBAJTUR
MË 4 DHJETOR 2008

Seancën e kryesoi **Jakup Krasniqi**, Kryetar i Kuvendit, kurse i ndihmoi **Xhezair Murati**, anëtar i Kryesisë.

Kryetari konstatoi se në seancë janë të pranishëm 84 deputetë dhe e deklaroi të hapur punën e saj.

Kryetari i njoftoi deputetët se Kryesia e Kuvendit, në marrëveshje me grupet parlamentare, në pajtim me rregullat 6.2 dhe 23 të Rregullores së Punës së Kuvendit, ka përgatitur dhe Kuvendit ia ka paraqitur rendin e ditës për seancën e sotme plenare.

Ndërkohë, Kryesia e Kuvendit, në marrëveshje me grupet parlamentare, i propozon Kuvendit që për seancën e sotme plenare të radhitet edhe Shqyrtimi i Rekomandimit të Komisionit për Buxhet dhe Financa lidhur me propozimin e Qeverisë për emërimin e anëtarëve të Bordit të Trustit Pensional të Kosovës.

Kryetari e hodhi në votim propozimin. Rezultati i votimit ishte, si vijon:

Për-----42;

Kundër-----17;

Abstenime-----3.

Kryetari konstatoi se Kuvendi me shumicë miratoi propozimin që në seancën e sotme të shqyrtohet edhe Rekomandimi i Komisionit për Buxhet dhe Financa në lidhje me propozimin e Qeverisë për emërimin e anëtarëve të Bordit të Trustit Pensional të Kosovës

Deputeti Gani Geci kërkoi të merrte fjalën, kurse Kryetari tha se, në bazë të rregullave procedurale, paraprakisht askush nuk ka parashtruar kërkesë për plotësimin e rendit të ditës.

Deputeti Geci insistonte që të merrte fjalën, andaj Kryetari dha pauzë 10 minuta për t'u konsultuar me kryetarët e grupeve parlamentare lidhur me procedimin e seancës.

Pas pauzës, kryetari tha se në takimin që kishte pasur me kryetarët e grupeve parlamentare, është vendosur që, para se të procedohet me rendin e ditës, t'u jepet fjala deputetëve.

Deputeti **Gani Geci** tha se ka kërkuar fjalën për ta ngritur, me urgjencë, çështjen e arrestimin e 3 shtetasve gjermanë. E dimë shumë mirë se shteti i Gjermanisë e ka njohur pavarësinë e Kosovës ndër shtetet e para, shteti i Gjermanisë ka mbi 2500 ushtarë këtu, shteti i Gjermanisë e ka një ambasadë, ka vënë marrëdhënie diplomatike me shtetin e Kosovës.

Shteti i Gjermanisë që nga viti 1990 deri më sot, në forma të ndryshme ka ndihmuar Kosovën, ndërsa ne jemi sjellë të papërgjegjshëm me shtetasit gjermanë, andaj dikush duhet të japë llogari për këtë.

Deputeti **Driton Tali** propozoi që Kuvendi të formojë një Grup strategjik i cili konform situatës së krijuar, si rezultat i ofensivës agresive politike të Serbisë, duhet të merret me analizimin e opsioneve alternative të realizueshme të interesave tona, duke pasur parasysh edhe interesat e qytetarëve shqiptarë të Luginës së Preshevës, të Bujanocit dhe të Medvegjës.

Është plotësisht legjitime që edhe ne shqiptarët, ashtu sikurse edhe fqinjët tanë verilindorë, të kemi projekte alternative të elaboruara mirë, të cilat do t'i përdorim sipas imponimeve të kohës.

Në vazhdim, Kuvendi i zhvilloi punimet me këtë

R e n d i t e:

1. Koha për pyetje parlamentare,
2. Interpelanca e ministrit Alush Gashi, sipas kërkesës së Grupit Parlamentar të LDD-së,
3. Rishqyrtimi i Ligjit për tubimet publike,
4. Shqyrtimi i dytë i Projektligjit për ndryshimin dhe plotësimi e Ligjit për Administratën tatimore dhe procedurat, dhe
5. Shqyrtimi i Rekomandimit të Komisionit për Mandate dhe Imunitete për heqjen e statusit të deputetit z. Sabit Rrahmani.

1. Koha për pyetje parlamentare

Deputetja **Njomza Emini** i parashtroi pyetje ministrit të Kulturës, Rinisë dhe Sporteve, Valton Beqiri, lidhur me finalizimin e Planit kosovar të veprimit për rini.

Ministri **Valton Beqiri** iu përgjigj pyetjes së deputetes Emini.

Deputeti **Enis Kervan** i parashtroi pyetje ministrit të Arsimit, Enver Hoxhaj, lidhur me arsimimin e nxënësve me nevoja të veçanta.

Ministri **Enver Hoxhaj** iu përgjigj pyetjes së deputetit Kervan.

Deputetja **Luljeta Shehu** parashtroi pyetje për Kryeministrin, Hashim Thaçi, lidhur me fatin e personave të pagjetur.

Zëvendëskryeministri **Ramë Manaj** iu përgjigj pyetjes së deputes Shehu.

Deputetja **Nurishahe Hulaji** i parashtroi pyetje ministrit të Arsimit, Enver Hoxhaj lidhur me nostrifikimin e diplomave të studentëve që i kanë kryer studimet jashtë vendit.

Ministri **Enver Hoxhaj** iu përgjigj pyetjes së deputetes Hulaj.

Deputeti **Emrush Xhemajli** i parashtroi pyetje ministres së Drejtësisë, Nekibe Kelmendi, lidhur me reformat në sistemin e Drejtësisë.

Ministrja Nekibe Kelmendi iu përgjigj pyetjes së deputetit Xhemajli.

Deputeti **Riza Smaka** i parashtroi pyetje ministrit të Bujqësisë, Idriz Vehapi, lidhur me tregtimin e produkteve të bletarisë.

Ministri **Idriz Vehapi** iu përgjigj pyetjes së deputetit Smaka.

Deputeti **Riza Smaka** i parashtroi pyetje ministrit të Bujqësisë, Idriz Vehapi, lidhur me riprodhimin e bletëve vendore.

Ministri **Idriz Vehapi** iu përgjigj pyetjes së deputetit Smaka.

2. Interpelanca e ministrit Alush Gashi, sipas kërkesës së Grupit Parlamentar të LDD-së

Kryetari ftoi përfaqësuesin e parashtruesit të interpelancës të Grupi Parlamentar të LDD-së që ta marrë fjalën.

Deputetja **Qamile Morina** tha se Lidhja Demokratike e Dardanisë, e brengosur për gjendjen alarmante në shëndetësi, i bashkohet vlerësimit të përgjithshëm të personelit mjekësor, të qytetarëve të Republikës së Kosovës, të pacientëve tanë dhe, së fundit, të institucioneve ndërkombëtare relevante, si të Organizatës Botërore Shëndetësore, se shëndetësia kosovare është në krizë të thellë dhe faktor shqetësues për situatën maksimalisht të përkeqësuar në Kosovë.

Ne kemi kërkuar këtë interpelancë me ju pasi që iu drejtuam juve edhe opinionit publik në konferencë për shtyp, ku patëm kërkuar nga ju që të ndërmerrni hapa në përmirësimin e gjendjes në këtë sektor dhe jo të merreni me çështje që u takon organeve dhe sektorëve të tjerë.

Qëllimi i LDD-së është shumë i qartë sot, duam të nxisim ndryshimin e diskursit të indiferencës dhe të përgjegjësisë institucionale karshi thellimit të krizës në shëndetësi, si dhe rrënimit të gjendjes së shëndetit në nivel kombëtar.

Ministria e Shëndetësisë po ballafaqohet me mungesë të vizionit dhe të konceptit të zhvillimit të shëndetësisë kosovare. Ajo dështoi të evidentonte saktë prioritetet e veprimit dhe, si pasojë, shëndetësia kosovare ka hyrë në një qark të mbyllur të së keqes.

Sistemi farmaceutik, sigurimi i barërave dhe të materialit shpenzues është një nga dështimet më të mëdha të Ministrisë dhe të Qeverisë së Republikës së Kosovës.

Përse mungojnë barërat, ato më prioritaret nga lista esenciale? Çdo mëngjes, zoti ministër, në mbledhjet e kolegjiutëve profesionale shtrohet lista e gjatë e ankesave të profesionistëve për mungesën e barërave dhe të materialit gjatë punës së tyre ditore.

Si do t'i finalizoni investimet kapitale, që janë përgjegjësi e juaja, në Onkologji, Mjekim Intensiv dhe Kardiokirurgji? Për Onkologji janë shpenzuar 2.055.000 euro vetëm për objekt dhe është vendosur aparati më modern i CT-së funksionale, por nuk përdoret. Si rezultat, populli i Republikës së Kosovës çdo ditë po vuan dhe po maltretohet me aparate më të dobëta në sektorin privat dhe askush nuk brengoset për këtë. A nuk ndieni përgjegjësi, zoti ministër, për çdo ditë vonese të punës së këtij instituti?

Projekti i dytë, Mjekimi Intensiv Qendror, edhe përkundër pyetjeve parlamentare në Kuvend, drejtuar juve për këtë projekt, me të vetmin qëllim që ta ngrisim cilësinë në trajtimin e pacientëve që luftojnë për jetë në mjekimin intensiv, nuk arritëm t'ju bindim dhe tani mjekimi intensiv vazhdon të rinovohet në formë kundërligjore. Përse, zoti ministër, e vazhduat projektin ashtu si e kishin paramenduar abuzuesit, çka ju bën të dalloheni prej tyre?

Për Projektin e Kardiokirurgjisë deri më tani janë dhënë me qindra mijëra euro. Vetëm nga buxheti i paraparë për këtë vit janë ndarë 256.000 euro, kurse me Projektbuxhetin e vitit 2009 janë paraparë afër 1 milion euro. Zoti ministër, a e dini ku e keni Kardiokirurgjinë dhe në çfarë faze e keni?

Në raportin e gjashtëmujorit të vitit 2008, vetëm 17% të buxhetit kanë qenë të shfrytëzuara për investime kapitale. Në kërkesë dhe në konfirmimin e kërkesës sime, drejtuar Ministrisë së Shëndetësisë për qasje në dokumente zyrtare, në tetor të këtij viti nuk më është lejuar qasja. Zoti ministër, kur unë si deputet e Kuvendit të Kosovës nuk kam të drejtë qasjeje në dokumente zyrtare, atëherë çka mund të pret qytetari i rëndomtë. Andaj, ju pyes, zoti ministër, sa është shfrytëzuar buxheti i paraparë për investime kapitale për këtë vit?

Në Qendrën Klinike Universitare të Kosovës, institucionin më të madh, më përgjegjës, me stafin më të kualifikuar, me numrin më të madh të punëtorëve, është e qartë se një riorganizim i tërësishëm i kësaj qendre është i domosdoshëm. Zoti ministër, sa po arrini të koordinoni bashkëpunimin me menaxhmentin e QKUK-së?

Veprimtaria private është dështim i plotë i Ministrisë së Shëndetësisë në implementimin e legjislacionit, në monitorimin jo të mjaftueshëm, si dhe në ngritjen e kapaciteteve për licencim. Këto e kanë bërë që praktika private të mbetet jashtë kontrollit dhe të kalojë në ilegalitet.

Lidhur me ngjarjet e fundit në këtë sektor, jemi kundër arrestimeve spektakulare mediatike, që po e rrënojnë dinjitetin e mjekut dhe po e godasin rëndë shëndetësinë kosovare.

Kryetari ftoi ministrin e Shëndetësisë të marrë fjalën.

Ministri i Shëndetësisë, **Alush Gashi**, falënderoi Grupin Parlamentar të LDD-së për kërkesën e parashtruar për të ofruar informatë për gjendjen në shëndetësi të Republikës së Kosovës.

Pyetja e parë, të cilën e kam marrë përmes paraqitjes suaj, ka të bëjë me gjendjen e përgjithshme në shëndetësi. Gjendjen në shëndetësi e kam gjetur shumë të rëndë.

Gjendjen jemi duke e ndryshuar, duke respektuar ligjin dhe duke institucionalizuar transparencën. Për këtë kohë të shkurtër, kemi arritur rezultate të pakontestueshme. Me rritjen e buxhetit për barëra 100%, me shtimin e furnizimit me barëra, me zvogëlimin e shpenzimeve të kabineteve në çdo pozicion, me realizim të projekteve dhe të shërbimeve në pritje për shumë vite, me lehtësim të procedurave, me monitorim dhe inspektime të vazhdueshme dhe angazhim për reformë rrënjësore në shëndetësi, fillimisht në farmaci, kemi rezultate të jashtëzakonshme.

Objektivat strategjike të Ministrisë së Shëndetësisë janë këto:

1. Krijimi i sistemit të qëndrueshëm financiar për sektorin shëndetësor.
2. Përmirësimi i vazhdueshëm i menaxhimit të resurseve ekzistuese dhe të cilësisë së shërbimeve.
3. Zvogëlimi i sëmundshmërisë dhe vdekshmërisë së popullatës.
4. Funksionalizimi i zhvillimit të sistemit të informimit shëndetësor,
5. Funksionalizimi, riorganizimi dhe plotësimi i infrastrukturës ekzistuese të sistemit shëndetësor dhe sigurimi i pajisjeve në përputhje me standardet evropiane, zhvillimi i shëndetësisë publike dhe private sipas kornizës ligjore.

Pyetja e dytë, ka të bëjë, siç thoni ju, me konfliktet brenda Ministrisë së Shëndetësisë. Sa i përket formulimit tuaj jospesifik për konflikte, nëse aludoni në pezullim të sekretarit permanent, mund t'ju përkujtoj se kjo nuk është e veçanta e Ministrisë së Shëndetësisë.

Me këtë rast ju informoj, se keni kërkuar informatë, se në fillim të vitit Policia e Kosovës ka njoftuar se është duke u zhvilluar hetime ndaj disa zyrtarëve të Ministrisë së Shëndetësisë, në mesin e të cilëve kishte edhe drejtorë të departamentesh. Ne nuk jemi në dijeni për emrat. Natyrisht, keqbërësit i kanë organizimet e veta dhe vazhdojnë me fushatë. Fushatës iu kemi përgjigjur me punë, me mënjanimin e blerjeve njëburimore, të ashtuquajtura blerje emergjente, me përmirësim të furnizimit me barëra dhe material shpenzues, me liberalizim të importit të barërave, me listë esenciale të përgatitur nga ekspertë e lëmive të ndryshme, me një proces plotësisht transparent, me pajisje diagnostike bashkëkohore, me mbikëqyrje të brendshme dhe të jashtme të përditshme.

Pyetja e tretë ka të bëjë me sigurime shëndetësore. Aktualisht, të gjithë qytetarët e Kosovës kanë sigurim shëndetësor themelor. Mund të jeni në dijeni se Ligji për sigurime shëndetësore është votuar në Kuvendin e Kosovës, i cili, për shkak të kostos së lartë buxhetore nuk është nënshkruar nga PSSP-ja. Pas hyrjes në fuqi të Kushtetutës së Kosovës, është kthyer në ripunim, gjë që jemi duke e bërë me ekspertë vendorë dhe të jashtëm.

Pyetja e katërt ka të bëjë me Qendrën Klinike Universitare. Qendra Klinike Universitare është i vetmi institucion shëndetësor publik terciar, e cila praktikisht është qendër emergjente, spital i qytetit për gjysmën e popullatës së vendit. Kjo gjendje është e papranueshme dhe vendimi im është i paluhatshëm. Duhet reformë rrënjësore në Qendrën Klinike Universitare.

Me kryetarin e Prishtinës kemi vendosur të themelojmë Spitalin e Prishtinës, ndërsa pas miratimit të Ligjit për partneritet publiko-privat, hapen shtigje të reja për partneritet.

Aktualisht, kemi furnizim mbi 70% të listës esenciale. Ka arritur pajisja në Qendrën Klinike Universitare dhe spitalet rajonale, është rinovuar hapësira për mjekimin intensiv në Qendrën Klinike Universitare, është në përfundim objekti për Onkologji dhe Radioatopi, janë siguruar mjete për fazën e dytë për realizim të punimeve në hapësirën e Kardiokirurgjisë.

Pyetja e pestë ka të bëjë me institucionet shëndetësore private. Në vendin tonë, institucionet shëndetësore private ushtrojnë veprimtarinë e tyre sipas ligjeve në fuqi. Deri më tani, për licencim kanë aplikuar 820 institucione private shëndetësore. 624 janë licencuar, 102 janë refuzuar, 76 janë në proces të licencimit.

Gjatë inspektimeve, për shkak të veprimeve të kundërligjshme janë shqiptuar 40 vendime për ndërprerje të aktivitetit. Ju informoj se arrestimet e fundit të disa profesionistëve shëndetësorë, janë rezultat i hetimeve të bëra nga Policia e Kosovës, e jo sipas ftesës së Ministrisë së Shëndetësisë.

Komisioni Parlamentar për Shëndetësi është në përgatitje të Raportit për institucionet shëndetësore private, nga i cili presim rekomandime.

Në vazhdim, ministri **Gashi** paraqiti të arriturat e Ministrisë së Shëndetësisë dhe problemet me të cilat po ballafaqohet kjo ministri në fushën e shëndetësisë, të cilat janë dhënë në formë të plotë në transkript.

Kryetari hapi debatin lidhur me Interpelancën e ministrit Alush Gashi.

Ai i njoftoi deputetët për kohën e ndarë për debat, si vijon: Grupi Parlamentar i Partisë Demokratike 37 minuta; Grupi Parlamentar i Lidhjes Demokratike 25 minuta; Grupi Parlamentar i AKR-së 11 minuta, Grupi Parlamentar i AAK-së 11 minuta; Grupi Parlamentar i LDD-së 11 minuta; Grupi Parlamentar “7+” 7 minuta; Grupi Parlamentar SLS-së 8 minuta dhe deputetët e pavarur të gjithë së bashku i kanë 10 minuta.

Opinione, vërejtje dhe sugjerime lidhur me Interpelancën e ministrit Alush Gashi dhanë: në emër të Grupit Parlamentar të PDK-së, **Selvije Halimi**, në emër të Grupit Parlamentar të LDK-së, **Lutfi Haziri**, në emër të Grupit Parlamentar të AKR-së, **Ibrahim Makolli**, në emër të Grupit Parlamentar të AAK-së, **Zylfije Hundozi**, në emër të Grupit Parlamentar të LDD-së, **Lulzim Zeneli**, në emër të Grupit Parlamentar “7+”, **Sadik Idriz**, në emër të Grupit Parlamentar të SLS-së, **Branislav Grbiq**, si dhe deputetët: Numan Baliq, Ibrahim Gashi, Berim Ramosaj, Shkumbin Demaliaj, Gani Geci, Drita Maliqi, Hajredin Kuçi, Mimoza Ahmetaj, Hajredin Hyseni, Riza Smaka, Edita Tahiri, Naim Rustemi, Gjylnaze Sylja, Nait Hasani, Flora Brovina, Zef Morina, Nurishahe Hulaj, Dragisha Miriq dhe Suzanë Novobërdaliu, që janë dhënë në transkript, i cili është pjesë përbërëse e këtij procesverbali.

Ministri Alush Gashi iu përgjigj vërejtjeve dhe sugjerimeve të deputetëve.

Në fund, në emër të parashtruesit të Mocionit për Interpelancë, Lulzim Zeneli tha se Grupi Parlamentar i Lidhjes Demokratike të Dardanisë, në përputhje me Rregulloren e Punës së Kuvendit, përkatësisht në pajtim me Rregullën 25 pika 9 i propozon për miratim Kuvendit të Kosovës, këtë

M O C I O N

1. Të formohet Komisioni hetimor parlamentar për t'i hetuar të gjitha këto shkelje ligjore në sistemin shëndetësor në vend dhe në veçanti në Ministrinë e Shëndetësisë, dhe
2. Të bëhet shkarkimi i ministrit të Shëndetësisë, si përgjegjës politik për gjendjen e rëndë në sistemin shëndetësor.

Kryetari tha se kërkesa e Grupit Parlamentar të LDD-së ka qenë që ministri ta informojë Kuvendin për gjendjen e rëndë në sistemin shëndetësor të Kosovës. Ky mocion është dashur të parashtrohet me rastin e kërkesës për Interpelancë.

2. Rishqyrtimi i Ligjit për tubimet publike

Kryetari i njoftoi deputetët me Vendimin e Kuvendit, të datës 30 korrik 2008, për procedimin me ligjet e pashpallura. Komisioni për Punë të Brendshme dhe Siguri, si komision përgjegjës raportues, në bazë të vendimit të Kuvendit ka rishqyrtuar tekstin e Ligjit për tubimet publike dhe Kuvendit i ka parashtruar Rekomandimet me amendamentet e propozuara për shqyrtim dhe miratim.

Kryetari hodhi në votim amendamentet e komisionit funksional, një nga një.

Kuvendi miratoi këto amendamente: 1, 2, 3, 4, 5, 6, 7, 8, 9, 10, 11, 12, 13, 14, 15, 16, 17, 18, 19, 20, 21 dhe 22.

Pastaj, kryetari hodhi në votim Ligjin në tërësi me amendamentet e miratuara. Rezultati i votimit ishte, si vijon:

Për----- 61,

Kundër----- 0,

Abstenime----- 1.

Kryetari konstatoi se Kuvendi miratoi Ligjin për tubimet publike.

3. Shqyrtimi i dytë i Projektligjit për ndryshimin dhe plotësimin e Ligjit për Administratën Tatimore dhe procedurat

Kryetari i njoftoi deputetët me raportet dhe rekomandimet e komisioneve të përhershme dhe të komisionit përgjegjës raportues lidhur me shqyrtimin e këtij projektligji.

Ai hodhi në votim, një nga një, amendamentet e Komisionit për Buxhet dhe Financa.

Kuvendi miratoi këto amendamente: 1, 2, 3, 4, 5, 6, 7, 8, 9, 10, 11 dhe 12.

Pastaj, kryetari hodhi në votim tekstin e ligjit në tërësi me amendamentet e miratuara. Rezultati i votimit ishte, si vijon:

Për-----60,
Kundër-----0,
Abstenime-----1.

Kryetari konstatoi se Kuvendi, me shumicë votash miratoi Ligjin për ndryshimin dhe plotësimin e Ligjit për Administratën Tatimore.

4. Shqyrtimi i Rekomandimit të Komisionit për Mandate dhe Imunitete për heqjen e statusit të deputetit z. Sabit Rrahmani

Kryetari i njoftoi deputetë se deputeti Sabit Rrahmani që nga data 28 mars 2008 nuk ka marrë pjesë në asnjë seancë plenare të Kuvendit dhe as që ka arsyetuar mungesën e tij, prandaj ky veprim i deputetit Sabit Rrahmani është në kundërshtim me nenin 70, paragrafi 3, pika 5 të Kushtetutës së Republikës së Kosovës dhe Rregullën 14.3 të Rregullores së Punës të Kuvendit.

Kryetari i Kuvendit, në pajtim me Rregullën 14.3 të Rregullores së Punës të Kuvendit i ka propozuar Kuvendit që deputetit Sabit Rrahmani t'i hiqet statusi i deputetit.

Komisioni për Mandate dhe Imunitete ka shqyrtuar propozimin për heqjen e statusit të deputetit të Kuvendit të zotit Sabit Rrahmani dhe të njëjtin e ka përkrahur.

Rekomandimi i Komisionit për Mandate e Imunitete, së bashku me propozimin e Kryetarit të Kuvendit, u është shpërndarë deputetëve.

Kryetari i Komisionit për Mandate e Imunitete, Ahmet Isufi e arsyetoi Rekomandimin e Komisionit.

Pastaj, Kryetari hodhi në votim Rekomandimin e Komisionit për Mandate e Imunitete. Rezultati i votimit ishte, si vijon:

Për----- 46;
Kundër-----10.
Abstenime-----4.

Kryetari konstatoi se Kuvendi, me shumicë votash, mori këtë

V E N D I M

Për heqjen e statusit të deputetit

1. Deputetit nga radhët e Partisë Demokratike të Ashkalive të Kosovës, z. Sabit Rrahmani, i hiqet statusi i deputetit të Kuvendit të Republikës së Kosovës, duke filluar prej datës 5 dhjetor 2008.
2. Me vendimin për heqjen e statusit të ish deputetit Sabit Rrahmani, të njoftohet Komisioni Qendror i Zgjedhjeve dhe OSBE-ja, Misioni në Kosovë, për veprime të mëtejme.

5. Shqyrtimi i rekomandimit të Komisionit për Buxhet dhe Financa lidhur me propozimin e Qeverisë për emërimin e anëtarëve të Bordit të Trustit Pensional të Kosovës

Kryetari i njoftoi deputetët me Rekomandimin e Komisionit për Buxhet dhe Financa lidhur me Propozimvendimin e Qeverisë për emërimin e anëtarëve të Bordit të Trustit Pensional të Kosovës, i cili ka rekomanduar që të shqyrtohet në seancën plenare.

Kryetari i komisionit funksional, zoti **Gani Koci**, e arsyetoi rekomandimin e Komisionit para deputetëve.

Kryetari kërkoi deklarimin e shefave të grupeve parlamentare lidhur me Propozimvendimin e Qeverisë për emërimin e anëtarëve të Bordit të Trustit Pensional të Kosovës

Pas deklarimit të shefave të grupeve parlamentare dhe të disa deputetëve, Kryetari hodhi në votim Propozimvendimin e Qeverisë për emërimin e anëtarëve të Bordit të Trustit Pensional të Kosovës. Rezultati i votimit ishte, si vijon:

Për----- 11,
Kundër----- 34,
Abstenime-----4.

Kryetari konstatoi se Kuvendi, me shumicë votash, nuk miratoi Propozimvendimin e Qeverisë për emërimin e anëtarëve të Bordit të Trustit Pensional të Kosovës.

Kryetari e deklaroi të mbyllur seancën në orën 17:30.

Kryetari i Kuvendit
Jakup KRASNIQI

Përgatiti:
Divizioni i Çështjeve Plenare dhe Procedurale